

明史藁

列傳第一百八十九

光祿大夫經筵講官明史總裁戶部尚書加七級臣王鴻緒奉

敕編撰

雲南土司三

緬甸二宣慰司

干崖宣撫司

潞江

南甸二宣撫司

芒市

者樂甸

茶山

孟連即猛臉

里麻

鈕兀

東倘

瓦甸

促瓦

散金

木邦孟密安撫司

孟養

車里

老撾

八百二宣慰司

緬甸在雲南極邊地古未通中國其部落有五城元至元中
屢討之乃歸附後於蒲甘緬王城置邦牙等處宣慰使司太
祖初卽位遣使諭之不能達而返二十六年三月八百國使
入洪都入貢因言緬國近其邊以地遠不能自達帝乃令西
平侯沐春遣使至八百國王所諭意於是緬國始遣其臣板
南速刺至進方物命宴勞之賜綺帛有差二十七年六月置
緬中宣慰使司以土官卜刺浪爲宣慰使賜其使二十人鈔
錠羅綺布匹有差二十八年緬國卜刺浪遣使桑乞刺查朝
貢方物因言百夷思倫發屢出兵侵奪其境土命遣使諭之
二十九年緬國復來訴因遣行人李思聰錢古訓諭緬及百
夷各罷兵守土緬國聞命思倫發亦奉詔罷兵適百夷部長

刀幹孟叛逐思倫發以故事得已永樂元年緬甸頭目那羅
增遣其屬郎尋蹇來朝貢方物初西平侯沐晟遣鎮撫鄧伯
通等撫諭之至是來朝且言緬雖遐裔悉願臣屬中國而道
徑木邦孟養多爲阻遏乞命以職賜冠服印章將來憑仗天
威歲効職貢庶免欺陵帝命設緬甸宣慰使司以那羅增爲
宣慰使遣使賜冠帶印章二年三月遣內官張勤頒賜緬甸
四月緬甸遣人來貢五月遣員外郎左洋使八百國并賜緬
甸冠帶襲衣五年四月緬甸土官那羅增等遣其屬洛霞等
詣闕貢方物謝罪先是孟養宣慰使刀木旦與戛里相仇殺
而那羅增乘釁發兵劫之殺刀木旦及其長子思爌發掠其
人口牛馬遂據其地事聞詔行人張洪等齎敕諭責之那羅

增懼遂歸其境土及所掠遣人詣闕謝帝諭禮部曰蠻旣服
辜其釋不問仍給以信符令三年一朝貢初卜刺浪分其地
使長子那羅增管大甸次子馬者速管小甸卜刺浪死那羅
增盡收馬者速土地人民馬者速往依速覲嵩土官板洋爲
贅壻至是復居小甸遣人來朝且訴其情敕諭那羅增兄弟
和好如初毋干天討六年五月緬甸宣慰使那羅增等遣頭
目洛霞等貢馬方物謝罪并謝賜金牌信符恩皆予賜七年
那羅增使來復遣中官雲仙等齎敕賜以金織文綺紗羅如
麓川十二年那羅增遣刺牙詣闕言爲木邦所侵掠帝以那
羅增素強橫遣人諭之使修好鄰境各守疆界洪熙元年遣
內官段忠徐亮以卽位詔諭緬甸宣德元年遣使往諭雲南

土官賜緬甸錦綺有差二年以緬甸大頭目莽得刺爲緬甸
宣慰使初緬甸宣慰使新加斯與木邦仇殺而死子弟背潰
散緬甸頭目耆老共推莽得刺權理請襲許之八年莽得刺
遣人來貢遣內官雲仙齋敕賜之并諭其保境勿侵木邦地
正統六年給緬甸信符金牌各一時麓川思任發叛將討之
命緬甸調兵待七年思任發兵敗過金沙江走孟廣緬甸宣
慰卜刺當起兵夾攻之帝諭木邦緬甸能擒賊首獻者予以
麓川地八年總督尚書王驥奏緬甸宣慰使馬哈省以速刺
等稱已擒獲思任發比覽緬書切切以麓川分地爲言臣以
論功行賞自國家成憲已諭其將思任發解京恩賞自不爾
吝也時緬甸已囚思任發於阿瓦城思任發之子思機發復

據麓川爲亂勢復熾緬甸恐獻思任發未必得地徒爲思機發所仇屢檄不報欲大軍殺思機發分地乃出思任發朝命遂有并征緬甸之諭是時大師已集騰衝緬甸宣慰遣人致書期以今冬會木邦人馬送思任發至貢章交官軍驥與剋期遣指揮李儀等領精兵爲前鋒通南牙山路擣貢章而緬人獻思任發者竟不至九年驥駐師江上而緬用大金樓船載賊渠往來江上覘官軍虛實驥知緬終不肯出賊且以麓川未平緬難不可復作乃率總兵官蔣貴等潛焚其舟數日緬人潰驥乃班師於是總兵官沐昂奏緬甸恃其僻險黨蔽逆賊應加兵恐煩師衆滇方連年征進財力困弊早涉相仍糧餉亦匱未可輕舉臣已遣人諭緬禍福俾獻賊首緬宜聽

從十一年木邦宣慰罕蓋法緬甸故宣慰子馬哈省以速刺遣刀路猛等偕千戶王政等獻思任發首及諸俘馘至京并貢金銀什器象牙土錦等物帝命馬哈省以速刺爲宣慰使賜路猛等宴并綵幣有差俾齎敕及綵幣褒賜兩宣慰仍給賜馬哈省以速刺冠帶印信未幾以速刺奏求孟養戛里地且請大軍亟滅思機發兄弟而已出兵爲助帝諭以思機發可不戰擒宜卽滅賊以來分地勿爲他人得也景泰二年八月賜緬甸宣慰使陰文金牌信符時緬甸宣慰以速刺已擒獲思機發久不卽獻又將思卜發放回孟養至是來索地左參將胡誌遣人以銀夏等處地方與之乃送思機發及其妻孥至金沙江歸於誌獻京師帝以思卜發旣遠遁不必窮追

仍加賞錦綺綵幣降敕褒獎成化七年鎮守錢能奏緬甸宣慰奏稱貢章孟養二地舊爲所轄欲爭據之尋奉旨往勘貢章係木邦隴川分治孟養係思洪發所掌非緬甸地難從所請令雲南守臣傳飭諸部而緬甸以所求孟養貢章地不許復執奏許地乃前朝明旨而貢章乃緬甸朝貢駐泊必由之途乞與緬甸又以金齒軍餘李讓乞令爲冠帶把事以備任使兵部尚書余子俊等以爲思洪發不聞有過豈可奪其土地李讓中國人而與爲把事亦非體宜勿許帝命兵部諭其使以朝廷一視同仁無間遠邇凡經赦不再犯者俱不復治孟養貢章是爾朝貢所由當飭邊臣往諭思洪發以通道往來不得阻遏李讓聽該管官司專遣其體朕意勿復多望弘

治元年緬甸來貢且言安南侵其邊境二年遣編修劉戡諭安南罷兵然緬地鄰孟養而孟養以緬先執思任發於朝也故怨緬嘉靖初思陸子思倫糾木邦及孟密擊破緬殺宣慰莽紀歲并其妻子分據其地緬甸訴於朝不報六年始命永昌知府嚴時泰衛指揮王訓往勘思倫夜縱兵鼓譟焚驛舍殺齋金牌千戶曹義時泰倉皇遁乃別立土舍莽卜信守之而去值安鳳之亂不暇究其事莽紀歲有子名瑞體少奔匿洞吾母家具酋養爲己子既長有其地洞吾之南有古喇濱海與佛郎機鄰古喇酋兄弟爭立瑞體和解之因德瑞體爭割馬革地爲獻受其約束號瑞體爲噠喇瑞體乃舉衆絕古喇糧道殺其兄弟盡奪其地諸蠻皆畏服之當是時滅緬者

木邦孟養而與緬相抗者孟密也孟密思漢子嫡庶紛爭訴於瑞體瑞體乃納思漢子思琢爲壻改名思忠遣歸孟密而奪其兄思宋印因假途攻孟養及迤西諸蠻以復前仇又使其黨卓吉侵奪孟養境後卓吉爲思真壻猛乃頭目別混所殺瑞體怒自將攻別混父子擒之仍招致隴川干崖南甸諸土官欲入寇旣覘知有備又慮他蠻襲其後乃遁歸於是鎮巡官沐朝弼等上其事兵部覆荒服之外治以不治噓喇已畏威遠遁傳諭諸蠻不許交通結納詔可時嘉靖之三十九年也時木邦土舍罕拔求襲不得怒投於緬潞江宣撫線貴聞之亦入緬瑞體自以起孤微有兵衆威加諸部而中國復禁絕之遂萌自王之志曰窺中國虛實誘內侵乃命線貴趣

召隴川多士寧士寧聚兵爲堆言中國廣大誠勿妄動瑞體
意稍寢未幾士寧爲其下岳鳳所殺于崖宣撫刀怕舉亦死
罕拔乃請瑞體入于崖于崖舉則隴川可坐定也瑞體子應
裏築黠多智言於瑞體曰隴川于崖雖無主遠難猝取孟養
思箇近在肘腋又吾世仇萬一乘虛順流下禍不淺瑞體深
然之因借木邦兵一萬取于崖而自率兵侵孟養旣至屢爲
思箇所敗思箇亦退保孟倫相持久而隴川書記岳鳳欺其
主幼私齎重賂投緬結爲父子蠻莫土目思哲亦迎附瑞體
乃調緬兵萬餘出入於迤西界上以牽制思箇復徵木邦罕
拔兵會岳鳳於隴川襲孟密萬曆元年緬兵至隴川入之岳
鳳遂盡殺士寧妻子族屬受緬僞命據隴川爲宣撫乃與罕

拔思哲盟必執思渾下孟密奉瑞體以拒中國僞爲錦囊象
函貝葉緬文稱西南金樓白象王莽噠喇弄王書報天皇帝
書中嫚辭不忍聞罕拔又爲緬招干崖許刀怕文代襲其兄
職怕文拒之與戰適瑞體遣子應裏率賊二十萬分戍隴干
間以其兵驟臨之怕文潰奔永昌遂取干崖印付拔妹罕氏
以女官攝宣撫臣緬而召蓋達副使刀思管雷弄經歷廖元
相佐之同守干崖以防中國於是木邦蠻莫隴川干崖諸蠻
俱已附緬獨孟養未下金騰副使許天琦遣指揮侯度持檄
招諭孟養思箇受檄益拒緬緬大發兵攻之思箇告急會天
琦卒署事副使羅汝芳受事搞思箇使令先歸待援且許以
世襲遂調漢土兵馬躡王騰越思箇聞援兵至喜令土目烏

祿喇送等領萬餘兵絕緬糧道於阿瓦寨且導大兵伏戛撒
誘緬兵深入截其歸路自率繼卒衝其前而令援兵自隴川
尾擊之緬兵旣大敗又糧絕屠象馬餉兵不給死者山積瑞
體窘甚會有陳於巡撫言生事不便者巡撫王凝立馳止之
汝芳聞檄忿甚然無可如何思箇待援不至岳鳳偵知之集
隴川兵二千兼程進導瑞體由間道遁去思箇追擊之緬兵
大傷當是時幾獲瑞體六年廷議遣使至孟養俾還所俘緬
兵象并資以金帛好言慰諭之瑞體不謝七年永昌千戶辛
鳳奉使買象於孟密思忠執鳳送緬緬遣回是年緬復攻孟
養報戛撒之怨思箇以無援敗奔將之騰越中途爲其下所
執送瑞體殺之盡并孟養地八年巡撫饒仁侃遣人招緬緬

不應十年岳鳳領緬兵襲破干崖奪罕氏印俘之俄瑞體死
子應裏嗣岳鳳喉應裏殺罕拔盡俘其衆歸緬鳳又說應裏
以大兵壓境自赴參谷起象兵數十萬分道內侵於是時雷
弄盞達南甸干崖木邦老姚思甸皆爲所破十一年焚掠施
甸寇順寧鳳子曩烏領衆六萬突至孟淋寨指揮吳繼勲與
千戶祁維垣死之又破盞達副使刀思定求救不得城破妻
子族屬皆盡且窺騰衝永昌大理蒙化景東鎮沅諸郡巡撫
劉世曾請以南京坐營中軍劉綎爲騰越遊擊移武靖參將
鄧子龍爲永昌參將各提兵五千赴勦并調諸土軍應援緬
亦合兵聚姚關綎與子龍大破之於攀枝花地乘勝追擊自
十年十月至十一年四月斬首萬餘復率兵出隴川孟密直

抵阿瓦緬酋猛勾詣緹降勾瑞體弟也應裏乃以子思斗守
阿瓦是時岳鳳知緬勢不足恃而大軍環攻之勢危急遂降
伏死京師詳隴川傳時諸部蠻多視鳳爲向背緬亦倚鳳爲
心腹鳳旣降諸部俱殺緬使來歸旣聞鳳擒被誅諸部旋復
解散陰附於緬應裏復披猖攻孟養蠻莫聲言復仇時副使
李材備兵騰衝遣兵援之戰於遮浪大破其象陣生擒五千
餘人先是猛哈思化投緬復進據蠻莫材遣人招之思化降
十九年應裏復率緬兵圍蠻莫思化告急時天暑官軍行不
前裨將萬國春夜馳至多設火炬爲疑兵緬人退追敗其衆
二十二年巡撫陳用賓築八關於騰衝列兵留戍募人至暹
羅約夾攻緬緬初以猛卯多俺爲嚮導寇東路至是遣木邦

罕欽擒多倫殺之遂築平麓於猛卯大興屯田是年緬帥思
仁寇蠻莫敗之斬其渠丙測二十三年十二月應裏託孟璉
孟艮二土司求朝貢致方物鎮巡以聞朝議令原差官黎景
桂等齎銀幣賜之至境不受詔以緬酋貢獻原無有葉文專
使景桂首事貪功納侮下於理三十一年阿瓦雍罕木邦罕
拔子罕榼俱入貢緬勢頓衰而暹羅得楞復連歲攻緬殺緬
長子莽機撾古喇殘破自此不敢內犯然諸近緬部先後附
緬如初至崇禎末蠻莫思縣爲緬屬守曩木河明叵黔國公
沐天波等走蠻莫思縣使告緬緬使人迎之且傳語述萬曆
時事并出神宗璽書索今篆合之以爲僞天波出已先所頒
印相比無差始服蓋自天啓後緬絕貢職至此無可考驗云

干崖舊名干賴談爌人居之東北接南甸西接隴川有平川
衆岡境內甚熱四時皆蠶以其絲織五色土錦充貢元中統
初內附至元中置鎮西路軍民總管府領三甸洪武十五年
改鎮西府永樂元年正月設干崖長官司二年頒給信符金
字紅牌於干崖并賜冠服三年干崖長官司長官曩歡遣頭
目奉表貢馬犀象金銀器皿謝恩賜鈔幣五年設古刺驛隸
金齒干崖長官司長官曩歡遣子刀思曩來朝貢象馬金銀
器皿方物賜賚如例自是三年每來朝貢不絕宣德六年改
干崖長官司隸雲南都司時長官刀弄孟奏乞援大侯長官
司例陞干崖爲州又奏其地近雲南都司而歲納差發銀於
金齒衛路遠乞改隸雲南都司而輸銀於布政司爲便帝問